

朝陽縣志卷十七

名宦

專制時代任地方官者鮮不以損下益上爲希榮固寵之機雖有以賢宰稱者亦率皆長於催科而短於撫字是以能吏多而循吏少也矧我邊塞郡縣自前清中葉設治歷年未久直如草昧初開官斯土者亦遂率爾操刀美錦學製故卓卓可稱者實鮮有其人至清季改縣爲府官方始見澄叙謹擇政績可述者略叙三數人以爲晨星碩果之存志名宦

朝陽縣志

卷十七

名宦

一

何厚吾字子寬山西人光緒二十九年署朝陽縣尋兼攝朝陽府廉明勤幹以循吏自期時地方官苛取於民陋規甚多都統錫良亟令裁去者十有三條而各縣皆延不履行公毅然照裁如命案鄉驗皆輕騎減從自帶行厨所至除飲水外毫無騷擾且溫語諭誠農民如父兄之詔誥子弟聞者咸喜曰吾鄉前以遭命案爲下嚴霜今則如逢時雨何幸如之判案援古經史並隨新潮流破除迷信不斤斤於舊刑律有胡僧控其廟鄰夥竊銅佛公知其借端羅織時值連年

歉收飢民載道遂判云史載梁武帝曾捨身救世爾佛慈悲爲懷憐此飢民亦效梁武帝捨身故智令彼等貨此銅易粟以充飢矣是爾佛之慈悲亦即爾奉佛所得之慈悲也奚訟爲訟者不服公又云汝必未曾讀史不知梁武帝之事歸問汝鄉舉監生員如果吾所判未是再來另判其人去不復來公判案戛戛獨造多類是時當清季變政如催辦學堂促成林業各新政令到必行先成立初高兩等小學於文廟繼募捐建築中學校舍於東街堂室共百餘間自光緒

三十年二月開工至十月而工竣立即招生開學一切置備井井有條自是朝郡五縣人文蔚起服務於政界社會者接踵相望無不頌我公造就培植之德至催辦林業除嚴飭各鄉農民實力進行外若城闈附近則親身督飭商民栽植樹木若公署學堂且親手操勞與在事人役同力合作故一二年中插秧播種排列成行者處處皆是今屈指計之已閱二十餘年如公署二堂前後中學講堂之前輪困大木蔭滿階庭者皆何使君之手澤也甘棠遺愛貽留遠矣惜

以勤政積勞致疾於三十年十二月卒於任卒後兩袖清風夫人及公子等至不能易喪服賴紳商感其德共集資相助始得歸櫬於山右云

吳燾字子明雲南人光緒初年進士三十一年守朝陽府政簡刑輕思欲變從前污吏故習適首縣鏃某前清宗室也貪婪賣法公屢以言諷之概不介意後遇有受賄顛倒案件府署輒以風聞調卷委員另判多平反之閱數月並詳請省憲裁去首縣朝陽歸知府直轄公積資甚深時已以道員補用是年秋即升遷

朝陽縣志

卷十七

名宦

三

而去蒞任未及一年去後士民懷之

王廼斌字恩普奉天新民縣人初以候補知縣委任朝陽縣徵收局長徵不擾民而解省之款轉豐於前省憲重之光緒三十二年適俞守去職即委署朝陽府公原籍距朝僅數百里又兼徵收居朝已逾一年故朝陽公署內官吏胥役之稗政陋習以及地方之劣紳訟士知之甚悉蒞任伊始即嚴示肅清吏治本身作則絕苞苴拒請託使吏胥畏憚不敢枉法刀筆之士好爲架唆擇其尤者以法繩之餘皆星散而吏治

以清時方厲行新政警察學校同時並舉事事湏集款而後行公率皆招集紳董會議公決辦法故不煩於苛斂不急於求功事雖舉而民不擾治朝三年餘廉明公正始終不踰宣統元年去任之日士民泐碑誌其德政焉

楊國棟字子王建平縣人鄉舉後投効奉天歷官通化各縣所至有聲民國十五年署朝陽縣知事下車伊始即通盤籌劃有亟應辦理者數事一爲裁撤房班設辦公廳及司法警察於公署身率吏役同力合作

朝陽縣志

卷十七

名宦

四

以免蒙蔽一爲整頓全境警察使衛民者不得擾民一爲全城受凌河水患倡議集款修築以免昏墊之灾一爲聯絡民團普設學校以清賊匪而造人才乃蒞任甫一月即升任熱河道尹未及措施幸中隔項任數月是年冬公長公子仲山來長斯縣一切秉庭訓以爲治在任二年餘凡子壬公擬辦數事大半就理故雖有子克承而一般輿論咸歸功於子壬公云